

Tutu é kuvi ūvi e táxnūu San Pablu iña Timóteu

Taxnūu Pablu tutú iña Timóteu

1 Xu'u é Pablú u ne, pustru Jesúcrístú u, tsí kuan ō ntío Xuva kō é víi u, tsi tá'xi ña xu'u ña tsi ni'i ko ntuví va'á iña ko nta'a Jesucristu. ²Taxnūu ú tutú sá'á iña o, Timóteu, dívīn é vāta kaa i'xá mīi ko e dóo ntio kó o. Na naxnuu viko Xuva ko o, ni i'xā ñá Jesucristu. Na ntūnta'ví ini ña o. Na tā'xi ña é kutúvín va'an.

É kā'an ñá iñá Cristu

³Ntē ntúvi ntē níñu kanakué'ē ú sintiá'vi nta'a Xuva ko kuēnta iña o. Tsí iña Xuva ko káde tsiñu ú ne, kaka'án nimá ko tsi vá'á ó kade ú, vatā o dé uva ata kō, ña intóo nte ntúvi di'na. ⁴Kanaka'án kó da ékun nteén ko ne, un vá'a tsi ncho nakiní u o vata koo é nakunuu díní nimá ko. ⁵Kanaka'án kó tsi kakuinti'xe ntí'xe o vatā o dé di'i kui'i o Loida dí'na, ni di'i o Eūnice. Iní u tsí kuān ó kakuinti'xe o di.

⁶Dukuān ne, é kākā'án u ni o tē díí díí ka kadan tsiñun ni'in nuū í e tá'xi Xuva ko ō da nata'án ntée ú nta'a kó dikí o kídaā. ⁷Tsí ña ni tá'xi Xuva kō é ū'vi ko, tsí tá'xi ña

é kūvi vii o, é kuinima kó ta'an kō, é kadā kuení va'ā ko nté koo vii o. ⁸Ñá ku kukā'an nuu o é kā'an ni ña'a kuenta iña Xuva ko. Ntē ña kuká'an nuu o kuenta iñá ko xu'u, é nuu kutū ú kuenta iña ña. Ntá tsi na kūtíi o é kānto'o o kuenta iña tú'ūn va'á san, tsí Xuva ko kaxntiī ña o. ⁹Tsí Xuva kō ne, nakáku ña kō ne, kana ña kō é kuvi o iña ña. Ñá tē nee é vā'á o ni ide o vata koo é ntio ña kō. Ntá tsi kuan ō ntío mii ñá é ta'xi ña ntuvi vā'á iña ko kuenta iña Jesúcrístu nté ntūvi di'na da de kú'vē ñá ñuxivi. ¹⁰É nañē'le ñá kō tsi dóo ntio ña kō da táxnūu ña Jesucristu é nakakū ñá kō. Tsi kúvi ide Jesucristu é ña kuvi víi ka doxi'lí san ni kō ne, ta'xi ña ntuvi vā'á iña ko é ña kantí'i dá kuinti'xe kō tú'ūn va'á san.

¹¹Xuva kō nakaxnúu ña ko é kā'an ntódō u tú'ūn va'á san, é víi u pustru iña ña, é naku'a'á ú ña'a san. ¹²Dukuān né, kuān ó kanto'ō kó vevii. Ntá tsi ña kakuka'an núu ko, tsí iní u xoo é kakuinti'xe kó ne, iní u tsí kuenta víi ña nuu i é xtúví ña kuenta nta'a kó da nté xee ntúvi é nainu xtúku ña.

¹³Víin kan é kākā'an tú'ūn é nuu é ntaā í san vatā ó nañé'ē ú o ne,

kuinti'xe ká o Xuva kō ne, kuinimá ka o ta'an o, vatā o tá'xi Jesucristu é viin. ¹⁴Na xntii Ēspíritū Sántu ō, ña é nuu nima ko, é kuēnta víin nuu i é vā'a é xtúví Xuva ko ntā'a o.

¹⁵Inin tsí un ntíi ntíi ña ntoo ñuú Asiá ne, xtuví mii ñá ko. Kuān o dé Figelu ni Hermógení dī. ¹⁶É vā'á koo na víi Xuva ko ni ñavi'i Onesiforu, tsi dóo kí'in itō náxnuu ka'nu ña nimá ko. Ñá ni kukā'an nuu ñá ko é nuu kutū u. ¹⁷Tsí dā xee ña ñuú Romá ne, un vā'a tsi nántuku ñá kó, un tsi da nte nání'i ñá ko. ¹⁸Xuva ko na ntūnta'ví ini ña ña dá xēe ntúvi dá nainu xtúku ña. Inin va'an tsí títín nuu i é vā'a édé ña ni kó dá itúvi ú ñuú Efesu.

Uun sntadun vā'a iña Jesúcristu

2 Divin, i'xá ko, ka'xi víin nima o, tsí Jesucristu katsi'i ntií ña ō. ²Un ntí'i tū'un e téku o é kākā'an ntódo u mé'ñū ña'a ne, divi tsi tū'ún ka'an ni ña'a, ña e ntáde ntaa, vata koo é kuan tsi koo nakuā'a ña tuku ña'a dī.

³Divin né, na kūtíi o nima o é ntō'o o dí vata kaa sntadun vā'a iña Jesúcristu. ⁴Uun ña'a, ña é kade sntadún ne, ña kúvi kini nūu ña tuku tsiñu, tsí da mii tsí é koo tú'vē ña é vii ña é kā'an tó'o ñā, sntadun ñá odo nūú san. ⁵Uun ña'a, ña kanadíkí ne, ña kúvi dūku ntée ña doméni tē ña ni kudadíi ña vatā o kú'vē i iña ñá nadíki. ⁶Uun ña'a, ña kade tsiñu tsiñu má kū'ú ne, di'na ña kaduku ntée ña na kí'i da'an ña é ta'vi ñā é kúvi iña mii ña. ⁷Kadā kuení va'ā o é kākā'án u ni ō ne, ta'xi Xuva kō é tēku o é un ntí'i nuu i.

⁸Nanū'ún iní o Jesucristu, dívi i'xá ika Dāvii, e ntóto ña dá xi'i ñá, vatā ó kaka'an tū'ún va'á san é kākā'an ntódo u. ⁹Núu i sā'a é kānto'o ko, é nuu kutū ú vata kaa ña é kíni kaa, tsí kuān ó kaka'an ntódo u. Ntá tsi tū'un Xuva kō ne, ñá te nuu kutū. ¹⁰Dukuān ne, kakutíi kó nimá ko é un ntí'i sā'a kuenta iña ña é nakaxnúu Xuva kō, vata koo é nakáku ña nta'a Jesucristú ne, kuntōo vā'a ña ni ña ntií dañu ntúvi.

¹¹Nuu é ntaā i é kākā'an ña:

Tē xi'i o ni ñá ne, kuntoo dadíi o ni ñā dī.

¹²Tē kutíi ō é nto'o kō né, kadā kú've dadíi o ni ñā.

Tē ka'an o tsi ñá ini o ñá ne, ká'an ñā tsi ñá ini ñá kō dī.

¹³Tē ña kada ntāa ó ne, ntá tsi divi ñā né, da mii é kāda ntaa ña é kākā'an ña, tsí ña kuvi nativi iní ña.

Ña'a, ña e dóo vā'ā ó kade tsiñu iña Xuva ko

¹⁴Tū'ún sa'a ká'an ni ña vata koo é ña kunáa ini ña. Ká'an ni ña nuu Xuva ko tē ña tíin nuu ká ña kuenta iña tū'ún san. Tsí ña vāda kaidiá'vi é kuan koo nāa núu o, tsi kídaa ne, ñā xkúntee ini ña ntátekú i san é kuinti'xe ña. ¹⁵Koon ntiin kādan tsiñun vata koo é vā'á koo ka'an Xúva ko iña o, vata koo é ña tuví nee nuu i é kūka'an nuu ó tē xeen ntá'a ña. Ká'an ñā tsi vā'ā ó den, tsí kaka'an ntaan tū'un ñā é nuu é ntaā i. ¹⁶Kuenta tsí viin; ñá ku dotó tsí ka'an tū'ún é kini kaa. Tsí ña é kuān o ntáka'án san ne, da díí díí ka ntákukini ntāa ña. ¹⁷Kaika tū'ún

e ntáka'an nã vatã ó kaika kui'i nta'xá san. Kuan ò kúvi ni Himēneu ni Fíletú di. ¹⁸Divi nã né, kūdana nã nēe é nuu é ntaā í, tsi ntáka'an nã tsi é ita ntí'xin ntuvi é ntóto xtuku ña'a. Ntánativi ñá ña'a, ña kuínti'xe i Xuva kō. ¹⁹Ntá tsi Xuva kō né, xtuví ñá tú'un nã é ña kantí'i, vata kaa xuu eti vi'i é tuvi kutu. Sál'a ne, vata kaa é ūve na'a kaka'an tú'un Xuva kō: “Ini Xúva kō xoo é i'xá nti'xe ña” ne, “Un ntíí ntíí ña'a, ña é kakuinti'xe i Xuva kō ne, ñá víi ka ña é kīni kaa.” Kuān ó kaka'an tú'un ñã.

²⁰Iní vi'i ka'nu iō kidí e kúvi oro, e kúvi káa kui'xín ne, iō e kúvi ūtun, e kúvi ntó'ō di. Kídí e dóo va'á san ne, ntáde tsiñu ni'i ña ntuvi dá viko ka'nu. E ña dóo neē va'á san ne, utén uten ntáde tsiñu ni'i ña. ²¹Xoó na'a, ña é ntuntoo nima í ne, kuvi ña vata kaa kídí va'á san é káde tsiñu ni'i ña ntuvi dá viko ka'nu. Tsi xtúvi xio Xuva ko ñã é kúvi ña iña mii ña, é kada tsiñu ni'i ña ña, tsi é iō tu've ña é vii ña é un ntí'i nūu i é vā'a.

²²Dukuān ne, ñá ku dē kuení o é kīni kaa, vatā o ntáde na kuetsi san. Kuntikín núu i é vā'á ò. Kuinti'xe o Xuva kō. Kuinima ó ta'an o. Kutúvín dadiin ni ūn ntíí ntíí ña'a, ña é vā'á nima í, ña e ntákaku ni'i Xuva kō. ²³Ntá tsi ña kún den kuénta da ntátiin dikí ña'a nuu i é ña íni ña. Inin tsi te kúvi ne, koó da ntánāa núu ña kuenta iña díkí san. ²⁴Ña é káde tsiñu iña Xuva kó ne, ñá vā'á o é nāa núu ña, tsi víi ña é vā'á ni ūn ntíí ntíí ña'a. Na nakuā'a vā'a ña ña'a, na kūtíi ña nima ñá ni ñã. ²⁵Ñá ku de kã'nu ña dá kã'an

ñá ni ñã'a, ña é ña ntákuinti'xe i é nuu é ntaā i, vata koo é tē kúvi ne, ta'xi Xuva ko te nādama ña nima ñá vata koo é kuinti'xe ña é nuu é ntaā í san. ²⁶Kidāa ne, ntutuni ña vata koo é nakáku ña má ito e xkáa tó'ō e ña vā'á san. Tsi e tīin nti'xe tó'ō e ña vā'á san ña vata koo é vii ñá nēe e ntío i.

Nté ntu ntáa ña'a san ntuvi dá dokó sa naínu xtúku Cristu

3 Ntio ko é kūtuni o sál'a: Tsi tē xee ntúvi dá dokó sa naínu xtúku Cristú ne, kidáa vē'xí ntuvi e dóo kīni koo kuvi. ²Kidáa kadā kuení ña'a da mii iña mii ña, dá mii e dóo kuinima ñá diu'un. Ká'an ñã tsi dóo ka'nu ña'a ña, tsi da mii ñã e dóo va'á ña. Ñá nākué'e ña síntiá'vi. Ñá kuiko ñu'u ña iña Xuva ko. ³Ñá kuinima ñá ta'an ña. Ñá ntuntā'ví ini ña ta'an ña. Dá'vi ñã dovete tá'an ña. Víi ña da nēe ka nuu i é ntio nima ña. Dōó kadā xení ña. Ñá ntio kue'en tsi ña é vā'a. ⁴Diko tā'an ña. Ñá kadā kuení kue'en tsi ña nēe e vā'á é vii ña. Dōó ka'nu víi ña. Ñá ntio ña Xuva kō; da mii tsi é ntio ña é vii ñá nēe é ntio mii ñã. ⁵Kani nta'ví ña kō é kã'an ñá e dóo nuní ña Xuva kō. Ntá tsi ña te nuu é ntaā i. Tsi ña ntákuinti'xe ña tē dóo ió ntii Xuva kō é vii ña.

Ñá ku kinin nūun iña ñá kuān ntáa san. ⁶Iō ñá kuān ntáa sán ne, ntákí'vi ña iní vi'i ña'a ne, ntaéni nta'ví ña ñadí'í tuntu, ña é iō kuetsi i, ña ntáde da nēe ka é kaikán nima mí i. ⁷Utén uten ntánakuā'a ña, ntá tsi ñá kakúvi kutú've ña nēe é nuu é ntaā i. ⁸Vatā o dé ña

tatan, ña é nanī Jani ni Jámbrī, é ña ni kuinti'xe ña é kā'an Muíseé ne, kuān ó de ña sá'a, tsí ña ntío ña kuinti'xe ña é nuu é ntaā i. Ña túvī nee iña é vā'á kue'en tsi e ntádē kuení ña. Ña ni kúvi vii ña é kuinti'xe ña é vā'a vá'a sa. ⁹Ntá tsi ña kutíi ña kaa dukūn ña, tsí kutuni un ntíi ntíi ña'a tsi dóo tuntu ñá, vatā o kútuni ñá'a iña Jani ni Jámbrī kídaā.

Uun sá nuu i é kākā'án Pablu ni Timóteu nté koo vií ña

¹⁰Ntá tsi inin va'an nté o nakua'á u, nté o de u é tuvī u ñuxiví sa, nté o kadē kuení ko é vií u, nté o kuinti'xe kó Xuva kō, nté o kutíi ú nimá ko, nté o kuinimá ko, nté o kutíi ú e dóo ntó'o kó, ¹¹nté o dé xení ña'a san ní ko, nté o nánto'lo ñá ko ñuú Antioquíá ni ñuú Iconiú, ni ñuú Listrá dí. Inin nté o kutíi u dá ēdé ña ní ko é kīni kaa. Ntá tsi nakáku Xuva kō ko é un ntí'i nuū i sá'a. ¹²Un ntí'i ñā'a, ña é ncho vii é vā'á kuenta iña Jesúcrístú ne, kuān koo nto'lo ña dí. ¹³Ntá tsi ña kini ntáa sán ní ña ntaéni nta'ví ta'an sán ne, da díí díí ka kadā xení ña. Kani nta'ví ña ña'a ne, dukuān ne, kani nta'ví ña'a san ñá dí.

¹⁴Ntá tsi divīn ne, ñá ku xtuvīn miin núu ī é kūtú've o, nuu i é inin tsi nuu é ntaā i, tsí inín xoo ñá'a é nakuā'a ña o. ¹⁵Tsí un tsi nte ntúvi da kulú'ntin inin tú'un é vā'á iña Xuva kó, divī tū'un é nañé'e o nté koo nakákun é kuinti'xe o Jesucristu. ¹⁶É un ntí'i tū'un Xuva kō é ūve na'á ne, divī tū'un é kākā'an Xúva kō. Kaidiá'vi é nakua'a o ñā'a, é nañē'e o ña mí'i

kākunaá ka ña, é nañē'e o ña nté koo vií ña é vā'a, nté koo kutú've ña é vii ñá nēe é ntío Xuva kō, ¹⁷vata koo é koo tú've va'á ña é kuntikin ñá Xuva kō, vata koo é kīni va'á vā'a ña nté koo vií ña é un ntí'i nuū i é vā'a.

4 Divīn ne, núu Xuva ko ni Jesúcrístu, ña é kadā kú've iña ña ntantíto ní ña xi'í san dá nainu xtúku ña é kodo nuū ñá ne, ká'an ú ni ō tsí tsiñu sá'a viin: ²Koon ntiin ka'an ntódōn tú'un Xuva kō. Nguentúvi da ka'an dá ka'an tsín ni ña'a, kuān té ura vá'a, kuān té ña té ura vá'a. Ntadan vá'an ña mí ña vá'a ō ntáka'an ña. Ká'an ni ña mí ña vá'a ō ntáde ña. Kué'en ña itsi nté koo vií ña. Kukuíi kudu'va tsi nakuā'an ña. ³Tsi vé'xi ntuvi dá ña kutíi ká ña nima ña é kīni ña tú'un é vā'á san. Dá kuntikin ñá titín mastru, ñá nakua'a da nēe ka nuu i é ntio ña é tēkú ña. ⁴Nakuitā ñá ata ña tú'un é nuu é ntaā í san ne, da mii tsi é kīni ña kuentu e ntáka'an ñá'a. ⁵Ntá tsi divīn né, kadā kuení va'á ó nēe é vā'á viin. Na kutíi o e dóo ntiī tū'un. Ká'an ntōdon tú'un va'á san nté koo nakáku ña'a. Kadan ntaan tsíñu o e tá'xi Xuva kō é viin.

⁶Xu'ú ne, kaxé'tē ú ntuvi iñá ko doméni iña Xuva ko. Dóko sá xee ntúvi é ntāka ú ñuxiví sa. ⁷É kūvi idé u vata kaa sntadun iña Xuva ko; é kūvi idé u ínu du've u kuenta iña ña; ñá ni xtuvī mii kué'en ú e kuinti'xe kó ña. ⁸Vi'a ve ne, koó da kantétu u é ní'í ko doméni e dóo va'a é tūvi va'a iñá ko nta'a Xuva kō. Tsi dóo vá'á ó kadē kú've Xuva kō né, divī ña tā'xi ña kó ntuvi dá

kixkadā kú'vē ña. Ntá tsi ña te da míi tsí ú ní'í ko, tsí un ntíí ntíí ña'a, ña e dóo diní i ntantétu ntuvi dá nainu xtúku ña.

Nuu i é vii ñá iña mii ña

⁹Koon ntiin kī'xin kantí'in mí tuví u. ¹⁰Tsí Demá ne, é xtúvi mii ná ko. E díi ka ntio na é ió ñuxiví sa ne, kué'en na ñúú Tesalonica. Cresenté ne, kué'en ña ñúú Galacia. Titó ne, kué'en ña ñúú Dalmacia. ¹¹Ntuví sa ú Luca ntóo ntí. Kūkuekán Marcú ne, kuntekan na te vē'xin, tsí kuví xntii nā kó tsiñu ko é káde ú i'a.

¹²E táxnūu ú Tiquicu é kī'in ña ñúú Efesu. ¹³Te vē'xín ne, kunī'in kutuún ko e xtúvi míi u nú vi'i Carpu dá itúvi ú ñúú Troa. Kuidon librú ko di; ntá tsi díi díi ka ntio ko é kuídon tutú ko e ntátinuu.

¹⁴Ná katsi'i ta'an káa, ná nani Alējandrú ne, dōo kiní o dé na nī ko. Ntá tsi kué'e Xuva ko nā é ntō'o na é kuān o dé na nī ko. ¹⁵Kuenta tsí viín, tsi ña ntío kue'en na tú'un va'á san e ntáka'an ntódo o.

¹⁶Da kúvi uun ito dá ñē'é u nta'a ña kaxntékú kú've ne, xōxó ni xntii i ko é ntáda ntaa ñá iñá ko. Un ntíí

ntíí ña xtúvi mii ñá ko. Tē ña vií Xuva ko kuēnta núu i sá'a. ¹⁷Ntá tsi ña ni xtúvi mii Xuvā kó ko. Tā'xi ña é kūvi ka'an ntódo ntí'i ú tú'un va'á san iña ña, vata koo é kīni un ntíí ntíí ña'a, ña é ña te ña Israeé san, nté koo nakáku ña. Dukuān o nakáku u mé'ñū ña dóo xení i san ne, ¹⁸kuan koo nakákú Xuvā kó ko da nēé ka nuu i é kīni kaa. Tsí divi ña vii ñá ko kuenta é vā'á koo xee ú nta'a ña. iKá'an o tsi dóo ka'nu ña ntii dañu ntūvi! Kuan tsi koo na kōo.

Taxnūu ña ntiusi

¹⁹Ká'ān ntiusi ní Prisca ni Áquilá, ni ūn ntíí ntíí ñavi'i Onesiforu.

²⁰Kátūvi míi Erastu ñúú Corintu. Xtúvi míi u Trofimu ñúú Miletu, tsí nchokuví ña. ²¹Koon ntiin é kī'xin di'na dá xēe ntúvi vi'xín san. Eubulu ni Pudenté, nī Linú, nī Claudiá, ni ūn ntíí ntíí ta'an ko ña kuínti'xe i, ña ntoo i'a, taxnūu ña ntiusi o.

²²Na kūnuu mé'ñū Tó'o ko Jesūcristu ó; na naxnuu viko Xuva ko nto ūn ntíí ntíí nto. Sá'a tsí é ká'án u ni o.